



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH na 35. redovnoj sjednici održanoj 30. oktobra 2018. godine, usvaja

## ZAKON

### O IZMJENAMA I DOPUNAMA ZAKONA O DRŽAVNOJ SLUŽBI U ORGANIMA JAVNE UPRAVE BRČKO DISTRIKTA BOSNE I HERCEGOVINE

#### Član 1

U Zakonu o državnoj službi u organima javne uprave Brčko distrikta Bosne i Hercegovine (Službeni glasnik Brčko distrikta BiH, brojevi: 9/14, 37/15, 48/16 i 9/17), u članu 2 vrše se sljedeće izmjene:

Tačke e) i n) mijenjaju se i glase:

„e) **„rukovodeći državni službenik, odnosno rukovodeći javni službenik“** je lice posebnog rukovodnog nivoa u organu javne uprave, koje rukovodi organizacionom jedinicom i koji je odgovoran za rad državnih, odnosno javnih službenika i namještenika.

n) **„radna mjesta vezana za mandat gradonačelnika“** su radna mjesta koja su vezana za mandat gradonačelnika, a koja se popunjavaju putem javnog konkursa u skladu s ovim zakonom.“

Iza tačke n) dodaju se nove tačke o) i p) koje glase:

„o) **„mandatna radna mjesta rukovodećih državnih službenika“** su radna mjesta posebnog rukovodnog nivoa koja se popunjavaju putem javnog konkursa na mandatni period u skladu s ovim ili posebnim zakonom;

p) **„radna mjesta članova Odbora za zapošljavanje“** su radna mjesta koja se popunjavaju putem javnog konkursa na mandatni period, u skladu s ovim zakonom, na kojim imenovana lica imaju status državnog službenika.“

U dosadašnjoj tački o) koja postaje tačka r) tekst: „koji imaju položen pravosudni ispit“ mijenja se i glasi: „diplomiranih pravnika;“.

Dosadašnje tačke o), p), r) i s) postaju tačke r), s), t) i u).

#### Član 2

U članu 3 stavu 2 riječi: „kao i lica zaposlena u Kabinetu gradonačelnika“, zamjenjuju se riječima: „kao i lica zaposlena na radnim mjestima vezanim za mandat gradonačelnika i stalne članove Odbora za zapošljavanje.“

Iza stava 2 ovog člana dodaju se novi stavovi 3, 4 i 5 koji glase:

„(3) Odredbe ovog zakona koje se odnose na radno-pravni status, stručno usavršavanje, ocjenjivanje, prava, dužnosti i odgovornosti i zaštitu na radu, kao i druga pitanja od značaja za ostvarivanje prava i obaveza po osnovu rada, analogno se primjenjuju i na službenike i namještenike zaposlene u Stručnoj službi Skupštine Brčko distrikta BiH.

(4) Postupak zapošljavanja i imenovanja lica na radna mjesta u Stručnoj službi Skupštine Brčko distrikta BiH provodi posebna komisija, po proceduri propisanoj aktom koji donosi predsjednik Skupštine Brčko distrikta BiH.

(5) Provedbene akte koji se odnose na primjenu ovog zakona u smislu stava 3 ovog člana, za službenike i namještenike Stručne službe Skupštine, donosi predsjednik Skupštine.“

### **Član 3**

U članu 6 stavu 1 tačka i) mijenja se i glasi:

„(i) otpremninu u slučaju prekobrojnosti i prilikom penzionisanja.“

### **Član 4**

Član 8 mijenja se i glasi:

#### **„Član 8 (Rukovođenje)**

(1) Rukovodni nivoi u organima javne uprave su:

- a) visoki nivo rukovođenja – rukovodioci organa javne uprave,
- b) srednji nivo rukovođenja – rukovodeći državni službenik, odnosno rukovodeći javni službenik,
- c) operativni nivo rukovođenja – šefovi nižih unutrašnjih organizacionih jedinica (odsjek, služba i jedinica).

(2) Rukovodilac organa javne uprave rukovodi radom svih službenika i namještenika zaposlenih u organu javne uprave i za svoj rad odgovara gradonačelniku.

(3) Srednji nivo rukovođenja odgovoran je rukovodiocu organa javne uprave, a operativni nivo rukovođenja odgovoran je srednjem nivou rukovođenja i rukovodiocu organa javne uprave.“

### **Član 5**

U članu 17 riječi: „rukovodeći državni službenik“ zamjenjuju se riječima: „rukovodeći državni službenik, odnosno rukovodeći javni službenik“.

### **Član 6**

U članu 23 stavu 4 riječi: „Posebni uslovi za radna mjesta“, zamjenjuju se riječima: „Kvalifikacije za radno mjesto“.

Stav 5 ovog člana mijenja se i glasi:

„(5) Organizacionim planom organa javne uprave utvrđuju se radna mjesta vezana za mandat gradonačelnika, mandatna radna mjesta rukovodećih državnih službenika i radna mjesta članova Odbora za zapošljavanje, koja se popunjavaju javnim konkursom u skladu s Pravilnikom o zapošljavanju.“

### **Član 7**

Član 24 mijenja se i glasi:

#### **„Član 24 (Radna mjesta u organima javne uprave)**

(1) Radna mjesta u organima javne uprave dijele se na:

- a) radna mjesta vezana za mandat gradonačelnika;
- b) mandatna radna mjesta rukovodećih državnih službenika;
- c) radna mjesta članova Odbora za zapošljavanje;
- d) rukovodeća radna mjesta;
- e) posebna radna mjesta;
- f) službenička radna mjesta;
- g) namještenička radna mjesta.

- (2) Radna mjesta vezana za mandat gradonačelnika, mandatna radna mjesta rukovodećih državnih službenika, rukovodeća radna mjesta državnih i javnih službenika, radna mjesta članova Odbora za zapošljavanje i posebna radna mjesta se ne razvrstavaju, a službenička i namještenička radna mjesta se razvrstavaju u kategorije.
- (3) Radna mjesta vezana za mandat gradonačelnika su sekretar Vlade, šef Kabineta gradonačelnika, sekretar Kabineta gradonačelnika, portparol Vlade i vozač gradonačelnika.
- (4) Mandatna radna mjesta rukovodećih državnih službenika su koordinator u Uredu koordinatora Brčko distrikta BiH pri Vijeću ministara Bosne i Hercegovine, direktor Direkcije za finansije, direktor Porezne uprave i direktor Trezora.
- (5) Radna mjesta članova Odbora za zapošljavanje su mjesta stalnih članova Odbora za zapošljavanje.
- (6) Rukovodeća radna mjesta su radna mjesta rukovodećih državnih službenika (direktor Ureda za upravljanje javnom imovinom, šef Stručne službe Skupštine, šef Inspektorata, zamjenik šefa Stručne službe Skupštine, šef pododjeljenja, pomoćnik šefa Policije, direktor Pedagoške institucije, šef sektora, šef Ureda i glavni inspektor – pomoćnik šefa Inspektorata) i radna mjesta rukovodećih javnih službenika (šef pododjeljenja).
- (7) Posebna radna mjesta su radna mjesta državnih službenika s posebnim ovlaštenjima i visokim stepenom odgovornosti u odlučivanju, kao što su: upravni inspektor, predsjednik Apelacione komisije i član Apelacione komisije.
- (8) Službenička radna mjesta su radna mjesta državnih službenika i radna mjesta javnih službenika.
- (9) Radna mjesta državnih službenika razvrstavaju se u sljedeće kategorije:
- šef niže unutrašnje organizacione jedinice, kao što je: šef odsjeka, šef službe, predsjednik Vijeća za izlaganje podataka o nekretninama i utvrđivanje prava na zemljištu, predsjednik Komisije za komasaciju;
  - inspektor, pomoćnik koordinatora u Uredu koordinatora Brčko distrikta BiH pri Vijeću ministara BiH;
  - stručni savjetnik;
  - viši stručni saradnik;
  - stručni saradnik;
  - stručni referent.
- (10) Radna mjesta javnih službenika razvrstavaju se u sljedeće kategorije:
- javni službenik I. kategorije
  - javni službenik II. kategorije
  - javni službenik III. kategorije
  - javni službenik IV. kategorije
  - javni službenik V. kategorije
  - javni službenik VI. kategorije
  - javni službenik VII. kategorije.
- (11) Namještenička radna mjesta su radna mjesta namještenika koja su razvrstana u sljedeće kategorije:
- namještenik I. kategorije
  - namještenik II. kategorije
  - namještenik III. kategorije.
- (12) Kategorije službeničkih i namješteničkih radnih mjesta mogu obuhvatati jedan ili više stepena.
- (13) Službenička i namještenička radna mjesta razvrstavaju se u određene kategorije i stepene po sljedećim kriterijima:
- vrsta posla;
  - stepen složenosti poslova;
  - odgovornost radnog mjesta;
  - samostalnost u radu;
  - kompetencije potrebne za dato radno mjesto;
  - kvalifikacije za radno mjesto.

(14) Odluku o razvrstavanju radnih mjesta i kriterijima za opis poslova radnih mjesta državnih službenika i namještenika u organima javne uprave i kompetencija potrebnih za dato radno mjesto i Odluku o razvrstavanju radnih mjesta i kriterijima za opis poslova radnih mjesta javnih službenika u organima javne uprave i kompetencija potrebnih za dato radno mjesto, u skladu s odredbama ovog člana donosi Vlada na prijedlog Odjeljenja za stručne i administrativne poslove.

(15) Odluku o razvrstavanju radnih mjesta i kriterijima za opis poslova radnih mjesta javnih službenika u Odjeljenju za obrazovanje i kompetencija potrebnih za dato radno mjesto donosi Vlada na prijedlog Odjeljenja za obrazovanje.“

### **Član 8**

U članu 28 tački b) riječi: „i poništenju“ se brišu.

Iza tačke d) briše se tačka: „(.)“, dodaje tačka zarez: „(;)“ i nova tačka e) koja glasi: „e) donošenje odluke o izboru kandidata.“

### **Član 9**

U članu 31 stavu 2 tačka b) mijenja se i glasi:

„b) dva člana koja predlaže nadležni rukovodilac organa javne uprave od kojih je jedan rukovodeći državni službenik, odnosno rukovodeći javni službenik iz tog organa javne uprave.“

### **Član 10**

U članu 40 stav 1 mijenja se i glasi:

“(1) Posebna komisija, imenovana odlukom gradonačelnika, nakon raspisivanja javnog konkursa, u skladu s Pravilnikom o zapošljavanju vrši izbor kandidata koji se biraju na radna mjesta vezana za mandat gradonačelnika.“

### **Član 11**

Član 42 mijenja se i glasi:

„Član 42  
(Obavještanje i provjera kandidata)

(1) Odbor za zapošljavanje dužan je izabranog kandidata obavijestiti o izboru prvi naredni radni dan nakon provedenog izbora kandidata, telefonom, e-mailom, putem internet stranice Vlade ili putem oglasne ploče.

(2) Izabrani kandidat dužan je u roku od pet radnih dana, od dana obavještenja o izboru, dostaviti dokaze kojim se potvrđuje ispunjavanje opštih uslova i kvalifikacija za radno mjesto.

(3) Na osnovu dostavljene dokumentacije, u roku od tri radna dana od dana dostavljanja dokumentacije, Odbor za zapošljavanje provjerava ispunjavanje opštih uslova i potrebne kvalifikacije za radno mjesto, kao i podatke na osnovu kojih je vršeno bodovanje.

(4) U slučaju da se u postupku provjere iz stava 3 ovog člana utvrdi da dokazi ne odgovaraju podacima u podnesenoj prijavi, kandidat se briše s rang-liste i provodi se procedura za sljedećeg kandidata s rang-liste u skladu s članom 41 stavom 4 ovog zakona i stavovima 1, 2 i 3 ovog člana.

(5) Odbor za zapošljavanje dužan je, najkasnije u roku od 24 sata nakon obavljene provjere kandidata, donijeti odluku o izboru kandidata.

(6) O rezultatima izbora kandidata, Odbor za zapošljavanje dužan je obavijestiti kandidate, putem internet stranice Vlade, u roku od pet dana od dana donošenja odluke o izboru.

(7) Obavještenje o rezultatima izbora kandidata ističe se 15 dana na internet stranici Vlade.

(8) Nakon isteka roka iz stava 7 ovog člana, smatra se da su svi kandidati obaviješteni o rezultatima postupka izbora kandidata.

(9) Kandidat koji nije zadovoljan rezultatima postupka može izjaviti žalbu Apelacionoj komisiji u roku od osam dana, računajući od prvog narednog dana od isteka objave na internet stranici Vlade.

(10) Apelaciona komisija dužna je u roku od 15 dana odlučiti po žalbi.

(11) Odluka Apelacione komisije je konačna.

(12) U slučaju odustajanja izabranog kandidata, Komisija za zapošljavanje postupka u skladu sa stavom 4 ovog člana ili poništava javni konkurs, odnosno interni oglas u slučaju da nema drugog kandidata koji ispunjava tražene uslove.

(13) Postupak izbora kandidata, od zatvaranja javnog konkursa, odnosno internog oglasa, do donošenja odluke o izboru, ne može trajati duže od 90 radnih dana, ne računajući vrijeme trajanja žalbenog postupka.

(14) Proceduralna pitanja, način ocjenjivanja kandidata, rad komisije za zapošljavanje i druga administrativno-tehnička pitanja utvrđuju se Pravilnikom o zapošljavanju.“

### **Član 12**

U članu 43 stav 2 mijenja se i glasi:

„(2) U skladu s odlukom iz stava 1 ovog člana, Odjeljenje za stručne i administrativne poslove dužno je objaviti odluku o poništenju internog oglasa, odnosno javnog konkursa.“

### **Član 13**

U članu 45 stav 2 mijenja se i glasi:

„(2) U slučaju da gradonačelnik u roku iz stava 1 ovog člana ne donese rješenje o zasnivanju radnog odnosa, odluka o izboru kandidata postaje obavezujuća i zamjenjuje rješenje o zasnivanju radnog odnosa.“

Stav 3 istog člana se briše.

### **Član 14**

U članu 67 stavovi 8, 9 i 10 mijenjaju se i glase:

„(8) U organu javne uprave ili instituciji može se organizovati pripravnost kao poseban oblik rada.

(9) Pripravnost iz stava 8 ovog člana predstavlja poseban oblik rada gdje službenik, odnosno namještenik nije prisutan na mjestu rada, ali je dužan biti dostupan radi izvršenja poslova i radnih zadataka.

(10) Odluku o uvođenju pripravnosti kao posebnog oblika organizovanja rada u organu javne uprave ili instituciji iz stava 8 ovog člana donosi gradonačelnik na prijedlog nadležnog rukovodioca organa javne uprave, odnosno institucije.“

Iza stava 10 dodaje se novi stav 11 koji glasi:

„(11) Odlukom iz stava 10 ovog člana propisuje se način određivanja i utvrđivanja pripravnosti, raspored pripravnosti, način pozivanja službenika, odnosno namještenika radi izvršenja poslova i radnih zadataka, način obavješćavanja organa javne uprave i institucija i službenika, odnosno namještenika o pripravnosti i druga pitanja u vezi s ovim posebnim oblikom rada.“

### **Član 15**

U članu 69 stav 4 se briše.

### **Član 16**

U članu 80 stavu 3 riječi: „mandatnu poziciju, koja je vezana za mandat gradonačelnika“, zamjenjuju se riječima: „radno mjesto vezano za mandat gradonačelnika“ i u stavu 6 riječi: „mandatnoj poziciji vezanoj za mandat gradonačelnika“ zamjenjuju se riječima: „radnom mjestu vezanom za mandat gradonačelnika“.

U istom članu, u stavovima 1, 2, 3, 4, 5, 7 i 10, riječi: „rukovodeći službenik“ zamjenjuju se riječima: „rukovodeći državni službenik, odnosno rukovodeći javni službenik“.

### **Član 17**

U članu 86 iza stava 4 dodaje se novi stav 5 koji glasi:

„(5) Izuzetno od stava 2 ovog člana, naknada za rad disciplinskog tužioca i zamjenika disciplinskog tužioca utvrđuje se u iznosu od 20% (dvadeset posto) od prosječne bruto plate zaposlenih u organima javne uprave, a naknada za rad Disciplinske komisije utvrđuje se u iznosu od 15% (petnaest posto) od prosječne bruto plate zaposlenih u organima javne uprave.“

Dosadašnji stavovi 5 i 6 postaju stavovi 6 i 7.

### **Član 18**

U članu 92 stav 6 mijenja se i glasi:

„(6) Disciplinskog tužioca i njegovog zamjenika imenuje gradonačelnik iz reda diplomiranih pravnika zaposlenih u javnoj upravi Distrikta.“

### **Član 19**

U članu 97 stavu 3 riječi: „tačkama a) i b)“, se brišu.

### **Član 20**

U članu 113 stav 1 mijenja se i glasi:

„(1) Prekobrojnost nastaje kao posljedica ukidanja pojedinih organa javne uprave, odnosno organizacionih jedinica u sastavu organa javne uprave ili radnih mjesta radi smanjenog obima poslova kao i u drugim slučajevima propisanim ovim ili posebnim zakonom koji utiču na promjenu radno-pravnog statusa službenika, odnosno namještenika.“

### **Član 21**

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-464/18  
Brčko, 30. 10. 2018. godine

**PREDSJEDNIK**  
**SKUPŠTINE BRČKO DISTRIKTA BiH**  
**Esed Kadrić**